

## NA·A PEKGIPA RINGA CHA·ANIRANGO SRIPE DONGAONI JOKANI CHOLKO AMENGAMA?

Pekgipa ringa cha·ani kamrangni gimin Sastro nambegipa talatani donga.

“Chu gitckakon, ringchakanio ua ching·cheton, ua rinokbalbal napangon uko ringnabe. Jaman ki·tiko ua chipu gita sua, aro chikil gita chika.

Nang·ni mikronrang dari me·chikrangko niamgen, aro nang·ni ka·tong jechakanirangko agangen. Na·a sagalni jatchio tusienggipa gita, ba jahasni maljurini kosako tugipa gita ong·gen. Angko dokaha, anga uko sanikjaha; angko satkapako anga uija. Anga basako mikselgen? Anga uko am·an am·kugen.” (Toe Skiani 23: 31 – 35)

Nang·ni janggi tanganio pekgipa ringa cha·ani chipu bisigita ong·ahaode poraiangkubo.

Jisu changsao churing chupekjringe neng·nikgipa mandeni golpoko aganaha.

‘Unon Jisu aganaha, “Badiaba mandeni depante sakgni gngangchim. Uamangoni degipa chongipa pagipana aganaha, ‘O apa, nang·ni gamoniko angni man·gni bakko angna on·bo. Unon uamangna gamrangko sualaha.

Uni ja·mano, adita sal ong·ahaon degipa chongipa an·tangni man·rikgimin gamrangko ra·e song chel·achi re·angaha; aro namgija dake an·tangni gamrangko gimaataha.

Aro uni pilak gamrangko bonatmanon ua a·songo kangal cha·a siani ong·beaha. Unon ua re·ange songni mande saksao dongnapeaha; aro ua uko wak nirikchina a·batangona watataha. Aro ua wakni cha·anirangko cha·e an·tangko okkaatna jotton ka·aha. Indiba pilakba una on·jaha.

Indiba ua gisik ra·pile inaha, ang` pagipani noko tangkana kam ka·giparang cha·na man·enga; indiba anga iano okkrie sina sienga. Anga chakate ang` pagipaona re·ange una agangen, ‘O apa, anga salgina, aro nang·ni nikanio papko dakaha; nang·ni depante ine mingkuna anga krajaha; nang·o tangkana kam ka·gipa nokol saksu gita angko dakbo.’

Unikoa ua chakate an·tang pagipaona re·baaha. Indiba ua chel·engpition uni pagipa uko niksoe ka·sachake dariange uko gipake ku·dimbeaha.

Unon depante pagipana aganaha, ‘O apa, anga salgina, aro nang·ni nikanio papko dakaha; nang·ni depante ine mingkuna anga krajaha.’

Indiba pagipa an·tang nokkolrangko aganaha, ‘joljol chola nambatgipako ra·bae uko ganatbo, aro uni jakona jakstem, aro ja·ona jakopko on·bo; aro matchu bi·sa milgipako mobae dokbo; an·ching cha·e katchana. Maina ia angni depante siahachim, indiba tangchapilaha; aro gimaahachim, indiba man·pilaha. Unon uamang katchana ale cha·na a·bachengaha.

Aro uni depante dal·batgipa a·bao dongachim. Unikoa ua re·bae nokona sepangbaoa gripgrip chrokako knaaha. Unon ua nokkolrangoni saksako okame iarang mai ong·enga ine sing·aha.

Unon ua aganaha, nang·ni jonggipa re·baaha; aro nang·ni pagipa uko an·seng baljokao man·soana matchu bi·sa milgipako dokaha.

Indiba ua aganchake pagipana inaha, nibo, indita bilsa anga nang·na gamaha, changsaba nang·ni ge·etako manigija dakkuja; indiba ripengskarang baksa katchana man·na gita na·a changsaba angna do·bok bi·sa mangsakoba on·kuja; indiba darirang baksa nang·ni janggi tanganiko minokgipa ia nang·ni depante re·baon unan na·a milgipa matchu bi·sako dokaha.

Unon pagipa una aganaha, dede na·ade pangnan ang baksa donga aro angni pilakan nang·nin. Indiba an·ching katchana aro ka·srokna nangachim; maina ia nang·ni jonggipa siahachim, indiba tangchapilaha; aro gimaahchim, indiba uko man·pilaha.

Ia golpoo, depante chongipa an·tangni janggi tanganio neng·nikanirangko ku·rachakaha. Uasan ong·aija, uni janggi tangenggipana bate una nambata janggi tangani donga ine ua ma·siaha. Ia golpoo, Isolara pagipagita ong·a aro an·ching sakanti pekgipa ring cha·anirango neng·nigiparangara depante chongipa gita onga ine Jisu talatengachim. Pekgipa ringa cha·aniko na·a watna man·jaengode ia golpoan nang·na namgipa kobor ong·a. Nambata janggi tanganiko tangatna nang·ko kema ka·e dakchakna sengenggipa Pagipaona na·a re·bana namnikgenma?

-H.B.C